

Glöövst du noch an den Oosterhaas?

Marie hett hüüt keen Lust op Huusopgaven. De Schooldag weer al so lang un nu will se endlich frie hebben. Ehr lütte Swester Merle hett dat goot! Se is eerst veer un geiht noch in den Kinnergoorn un hett veel mehr Tiet to'n Spelen as Marie. Jüst nu speelt Merle mit ehr

5 Poppen un Kuschedeerten un singt liesen vör sik hen. Marie würr geern mitmaken, aver Merle is in ehr Welt un süht un höört ehr gor nich. So geiht Marie na ehr Stuuw un packt langsam ehr Bökertasch ut, ok dat Huusopgavenheft. In Religion hett Fru Hansen hüüt mit

10 Jan ehr luut fraagt, of se noch an den Oosterhaas glöövt. All de Kinner in de Klass hebbt lacht un Marie hett en roden Kopp kregen. Jan kann so blöod ween! Se is doch al acht Jahr oolt! Wokeen glöövt denn noch an den Oosterhaas! Fru Hansen hett nich lacht un all de Kinner so lang ernst ankeken, bet dat wedder ganz liesen weer. Denn hett Marie vertellt, dat se nich mehr an den Oosterhaas glöövt, aver ehr lütte Swester. Un Mama, Papa un se hebbt

15 beslaten, dat se nix verraadt, bet Merle sülven rutfinnt, dat dat keen Oosterhaas giff. Denn hett Anna sik mellt un seggt, dat se en lütten Broder hett, de ok an den Oosterhaas glöövt un se ok nix verraden deit. Dat dee goot!

An't Enn vun de Stünn hett Fru Hansen de Klass en lütte Huusopgaav geven. Jeedeem schull bet tokamen Week wat doon, woröver sik een in de Familie freut. Dat is en lichte

20 Huusopgaav! Marie mutt gor nich lang nadenken. Se haalt dat Vörleesbook vun ehr Regal. Merle freut sik jümmers, wenn ehr grote Swester ehr Geschichten vörleest. Mal sehn, wat för en Geschicht se sik hüüt utsöcht denkt Marie, as se na Merle ehr Stuuw geiht.

Fragen:

1. Worüm hett Marie keen Lust op Huusopgaven?
2. Över wat hett Fru Hansen mit de Kinner in den Religionsünnericht snackt?
3. Worüm hett Marie en roden Kopp kregen?
4. Wat is en lichte Huusopgaav för Marie?

Karen Nehlsen

Lösungen:

1. Worüm hett Marie keen Lust op Huusopgaven?

Ehr Schooldag weer al so lang un Marie much nu frie hebben as ehr lütt Swester.

2. Woröver hett Fru Hansen mit de Kinner in den Religionsünnerricht snackt?

Fru Hansen hett mit de Kinner över Oostern snackt un wull weten, woans de Kinner un ehr Familien Oostern fiert.

3. Worüm hett Marie en roden Kopp kregen?

Jan hett ehr hänselt un luut seggt, dat se noch an den Oosterhaas glööv't.

4. Wat is en lichte Huusopgaav för Marie?

Dat is licht för ehr wat to doon, woröver sik een in de Familie freut.